



السلام عليكم ورحمة الله كيف حالكم؟ الله
يبارك فيكم يارب ويرضى عنكم.

الحمد لله وأشهد أن لا إله إلا الله وأشهد أن
محمدًا رسول الله صلى الله عليه وسلم أما بعد
. أهلاً ومرحباً بكم في هذا الاليف الجديد مع
خطة العودة...إحنا المرة اللي فاتت كان في
لايف كده قبل دا بالظبط. اسمه مازال هناك
وقت للعودة. وكان عبارة عن لايف بيبين
قصص ناس عادت رغم طول البعد ورغم
شدة الخطأ اللي حصل منهم، زي عمر بن
الخطاب وزي عكرمة ابن أبي جهل رضي الله

عن الجميع. وأضفنا لكده بعض الناس رجعوا.
مش هقول رجعوا من حاجة غلط ولكن عملوا
عملية عودة إلى حاجة أفضل، زي أنس ابن
النضر. وضربنا مثال بأنس ابن النضر حد هو
معملش حاجة غلط بس هو حتى لما فاتته الخير
في غزوة بدر قال لئن أشهدني الله مشهدا آخر
(ليرين الله ما أصنع) فلما كان يوم أحد قاتل
طبعاً القتال العظيم بتاعه أنس ابن النضر
وأستدرك ما فاتته في غزوة بدر، وهناك مثال
لشخص بين ده و دا يعني لا كان كافر زي
عمر الخطاب وعكرمة وكان شديد على
المسلمين. ولا هنقول إن هو كان بيستدرك
حاجة كويسة إن هو مغلطش أصلاً زي أنس
ابن النضر ضربنا مثال بكعب ابن مالك بقى
حاجه في النص ما بين دا ودا عمل إستدراك

وعمل طلعة كده بعد خطأ كبير عمله هو اه
مش كفر ولا هو فاتة خير بس زي بدر ،لأ،
ده فاتة غزوة تبوك بالكامل ولكن استدراك
كذلك بتوبة صادقة.

اتكلمنا عن عمر بن الخطاب جوا إسلامه لما
اخطأ في يوم الحديبية. وقال كلام شديد شوية
يوم الحديبية مكناش المفروض أن هو يقول
كلام شديد زي دا للنبي عليه الصلاة والسلام
"لما نعطي في ديننا الدنيا أسنا على الحق وهم
على الباطل" والكلام دا. تمام؟

عمر رضي الله عنه وأرضاه رجع ثاني وقال
عملت لذلك أعمالا. يعني لما كنت بافتكر يوم
الحديبية وإزاي أنا أتعصبت وقلت كلام كده
للنبي عليه الصلاة والسلام مكانش المفروض
أقوله. فأننا استدركت بأن أنا عملت لذلك

أعمالاً. فمازلت أتصدق وأصوم وأعتق حتى ظننت أنه خير. يعني بيقول أنه مازلت أتصدق وأصوم والكلام دا لدرجة إن أنا قلت لعله خير اللي حصل ده. لعله خير. فسبحان الله يعني استدراك وعودة رائعة من عمر سواء في حال كفره أو بعد إسلامه لما ذل زلة كده في الحديبية.

استدراك رائع شفناه من عكرمة بن أبي جهل عودة في مدة قد اي؟ وشفنا عودة خالة ابن الوليد وعودة عمرو ابن العاص وخالد بيقول لعمر إلى متى؟ يعني حتى متى؟ هنفصل على الوضع دا ورجعوا وصاروا من أئمة الإسلام ومن قادة المسلمين. وشفنا استدراج أنس ابن النضر لما رجع أو عمل الأحسن اللي كان بيتمناه أول ما جت الفرصة. المهم الفكرة كلها

ان إحنا كنا نتكلم أن (الاستدراك هو تعويض ما فات باصلاح او بالاجتهاد فيما هو آت) وده العنوان الرئيسي اللي حطيناه المرة اللي فاتت و هي العودة او الاستدراك بتعويض ما فات بالاجتهاد فيما هو آتى. ونصحناكم بكتاب موجود على النت. كتاب مش كبير حوالي مية وخمسين صفحة وهو كتاب فقه الاستدراك للدكتور محمد الأفضل.. هو كتاب جميل اوي. وفيه أغلب الكلام اللي إحنا هنقول له النهاردة. الشاهد يعني إن أنا عايز أقول أن الاستدراك دا أو العودة هي تعويض ما فات بكل بساطة متبصش وراك لكن تجتهد فيما فيما هو آت.

خلينا نبدأ النهاردة نخط نقطة من أول السطر و نبدأ بدايتنا النهاردة هنقول إن عشان يحصل عودة لابد من دوافع. يعني في دافع هو اللي

بيدفعني دائما للعودة. او الاستدراك خاينا نسال
سؤال هو "ليه انتم اغلبكم طلبة يمكن بتجتهدوا
في آخر السنة؟ يعني اللي مقصر فيكم طول
السنة بيعمل استدراك لآخر السنة او تعويض
وبيلم المنهج فعلا بيلم وفي معجزات بتحصل.
في آخر السنة حاجات بتتلم في اسبوع
اسبوعين وتلاتة بيخش بيحيب درجة مش
وحشة يعني ايه اللي حصل هنا؟ اللي حصل
هنا دافع، ليه اول السنة دايم السينااريو هو هو
اول السنة بنقعد ندلع ونيجي على آخر السنة
بنجتهد جامد جدا وبعد كده الدنيا بتعدي معانا.
يعني اللي يحيب مقبول. جيد. جيد جدا المهم
الدنيا بتتجبر وتعدي. ليه انا دايم كل سنة اجي
اخش اول السنة وأقول أنا هذاكر من اول
السنة وكالعادة مذاكرة من اول السنة.

وكالعادة بذاكر آخر السنة وخلاص؟ لأن الدافع
مش موجود في أول السنة من الآخر يعني.
وطالما مفيش دافع مش هتחס إنك مدفوع
لأنك أنت تعمل أداء عالي. طول ما السنة
طويلة وطول ما أنت مطمئن الامتحان لسه
بدري عليه عادي. أول ما بتتزنق بقى
وبتكتشف الامتحان خلاص فاضل عليه
أسبوعين. فاضل عليه شهر. تبتدى تتجنن

متجنن عايز تاكل الدنيا دى اكل. يبقى إذا هو
نفس الدافع احساسا بخطر النهاية.. مش بس
مجرد خطر النهاية. ده احساسك بالفضيحة
المتوقعة لو أنت سقط في السنة ومنظرك قدام
اهلك، اللي بتتوقعه من المصير إن والدك
ووالدتك. إنك أنت هتفقد أصدقائك اللي هيعدوا
للسنة اللي بعدها وهترجع أنت سنة، و منظرك

قدام نفسك حاجات كثير قوي، ممكن بتعتبرها
دوافع بتخليك خايف أصلا مرعوب مجرد
فكرة إنك أنت تسقط او كدا خاينا نقول ان انت
عندك نفس الفكرتين موجودين. لو أنت عايز
دلوقتي تتدارك وترجع سواء ترجع من
معصية أو سواء بتحسن وضع سيء أنت
شايف نفسك فيه. مش هقول إن أنت ضال ولا
عاصي ولا فاجر ولا ولا، لا. بس يعني مثلا
شايف إنك مقصر في طلب العلم، مقصرة في
قرآن، نفسك تراجع من زمان، عايز بقى
أقوم الليل بقالي فترة مقمتش الليل، عايز بقى
أحافظ على صلاة الفجر بوقع أحيانا، عايزة
اعمل حاجات كثير مقصرين فيها، سواء بقى
التقصير ده كان في معصية فعلا أو كان في
طاعة واجبة، أو كان تقصير في مستحب، أنا

مش هيفرق معايا قوي التقصير في اى؟؟ لا
هي نفس الفكرة اللي هدور حوالها النهاردة
إن أنا بستدرك شيء أنا حاسس إن أنا مفرط
فيه بقالي فترة. سواء الشيء ده كان واجب أو
مستحب مش مهم. لكن أنا عايز أفوق بقى
..ونقطة من أول السطر يبقى لازم الأول
أحقق الدافع.

فيه دافع لازم نفس الدافع دا اللي قولناه في
الامتحانات هو موجود بقوة شديدة جدًا في
حياتك. أولا الامتحان موجود، وللأسف ميعاده
مش معروف وديه مشكلة.

عارفين إيه مشكلتنا يا جماعة؟ إن إحنا
بنتعامل مع الموت زي إمتحان آخر السنة. إن
هو هيجي في آخر السنة.. إن إحنا دايما
مفترضين إن الموت سيأتي في آخر العمر

فعادي بقى. لما يبقى عندي الستتاية السبعناية
تمانيناية. ساعتها بقى ربنا يحلها قبل ما أموت
بشوية هبقى كويس ودي كارثة كارثة كبيرة
جداً للأسف إحنا لما أتعودنا إن إحنا نزنق
نفسنا في آخر الوقت تعودنا لازم آخر الوقت،
طب إيه هو آخر الوقت بالنسبة لحياتك
الدنيوية دي؟؟ لا يوجد يعني مافيش أنت ممكن
تموت دلوقتي في اللايف اللي إحنا فيه أنا
ممكن أموت دلوقتي وأنا بكلمكم فين آخر
الوقت؟ ولذلك التراخي اللي أنت عايش فيه دا
سواء في أنك أنت تصلح من نفسك أو تصلح
من نفسك من حجابك تصلي الفجر تحفظي
القرآن تطابي العلم ، هذه الاريحية والتراخي
اللي إحنا عايشين فيه دا أكيد لابد أن يكون عن
غفلة شديدة جداً أو محاولة خداع نفسي، حيلة

نفسية أنت بتضحك على نفسك بها إن أنا إن
شاء الله هعيش. وأكيد يعني هموت وأنا كبير.
وأكيد يعني ايه في ستنايه يا سبعيناية ما أنا
مش هموت صغيرة يعني، على أساس ايه؟؟
معلش أنا اسف. إحنا دفنا اصحابنا خلص
الكلام.... إحنا دفنا اصحابنا.

كل واحدة من اللي قاعدين فيكم دفنت
صاحبته، أو دفنت جارتها اللي في سنها، أو
دفنت قريبتها عشرة العمر، كلنا كده، مفيش
حد فينا مدفنش صاحب ليه؟ صح؟ ولا قريبه
اللي كان أصغر منه ولا دفن جار كان أصغر
منه. أنت مستتي ايه؟ لذلك أحد السلف كان
بيقول كلمة مؤلمة جدا جدا. يقول إذا مات
صديق الرجل فقد مات.. يعني صاحبك مات
يبقى أنت مت خلاص. يعني إيه الفرق بينك

وبينه؟؟ الفرق إن ربنا اختاره ماختر كس بس.
هي مسألة وقت. وطالما عدت عليه هتعدى
عليك. وطالما وصلتله يبقى أنت مش بعيد.
أنت خلاص. إذا مات صاحب الرجل مات
احفظها دى.

كم واحد بقى دفنته؟ ده أنت ربنا ساترها معاك
لغاية دلوقتي، ده إحنا مش بنقولك دفنت واحد،
ده إحنا دفنا عشرات، من اصدقائنا. تمام؟ إحنا
مبندفنش كبار أصلا. يعني إحنا دلوقتي لو
عديت في الخمس سنين اللي فاتوا حضرت
جنازة كم واحد كبير وكام واحد صغير أنت
هتزهل من الرقم. إحنا بندفن ناس صغيرة
دلوقتي خلاص. لما بنسمع عن واحد كبير
مات بنستغرب. لأن فيهم حوادث سيارات

وجلطات وكورونا يعني أزومات قلبية.
وحاجات في يعني

إحنا دفنا أصحابنا أكثر ما دفنا أجدادنا
وأعمامنا والكلام دا. أنت مستتي إيه؟ إذا مات
صاحب الرجل مات، خلاص الكلام خلص.
تمام؟ أنت دلوقتي للأسف بتتعامل بسذاجة،
بتتعامل على إن خلاص ميعاد تسليم الورق
زي ميعاد تسليم الورق بتاع سنة تالتة اللي هو
آخر السنة بالنسباك ستين وسبعين والكلام دا،
طب ازاي؟ فده تصرف غبي أسف يعني
تصرف غبي جداً عشان ده اللي هيتقاله يوم
القيامة (و جاءت سكرة الموت بالحق ذلك ما
كنت منه تحيد) يعني ايه تحيد؟ يعني عايز
تزوغ منه. يعني قاعد مش عايز حد يفكر
به؟ يعني ياعم سيبك من سيرة الموت دي

بقى، ياعم غير السيرة النكد دي، ياعم فال الله
ولا فالك ياعم ما تقول لنا حاجة حلوة، طب
وأنا لما أقولك إنك هتموت أنا بستعجلك! ولا
هتموت بدري! ده بالعكس ده أنا باكرمك، ده
أنا بفوقك (ذلك ما كنت منه تحيد ونفخ في
الصور ذلك يوم الوعيد وجاءت كل نفس معها
سائق وشهيد) بص بقى الكلام (لقد كنت في
غفلة من هذا) أنت كنت قاعد بتغسل نفسك
ومش عايز تقنع نفسك مش عايز تواجه
الحقيقه المرة (لقد كنت في غفلة من هذا.
فكشفنا عنك غطاءك. فبصرك اليوم حديد)
ادي أول دافع لك إن الإمتحان لو أنت بتجتهد
في الدراسة عشان الإمتحان كمان أسبوعين
خد المفاجأة أنت تسليم ورقتك ممكن يكون
كمان ثانيتين مش أسبوعين، يبقى أنا لازم

أكون على قبة الإستعداد أربعة وعشرين ساعة
طول الاسبوع جاهز إن أنا ألقى الله سبحانه
وتعالى. تمام؟

تخيل بقى النبي عليه الصلاة والسلام لما جاءه
رجل قاله قل لي كده وصية من الآخر. عايز
حاجة من الآخر. قال (لا يزال لسانك رطباً
من ذكر الله) عند التأمل في الوصايا دي
رهيبة رائعة لأن هي فعلا مخلياك جاهز
لتسليم الورق في أي وقت. لا يزال خلاص لا
يزال لسانك رطب من ذكر الله تعالى. فأنا
جاهز أي وقت انا معكم يعني اي وقت تسليم
الورق انا جاهز. فده أول حاجة. أول حاجة
بتخايك تتعجل عمالية الافاقة والعودة
والاستدراك إنك ممكن تسلم ورقتك في ثانيه
واحدة. هتديك مثال تاني أنت عايشه في

الكلية، أنت دلوقتي الدكتور قال يا جماعة في
كويز يعني إمتحان مفاجئ في أي وقت عليه
نص الدرجة. هيحصل ايه؟ كل الناس هتيجي
مذاكرة، كل مرة نفس الكلام. أنا بقولك دلوقتي
ممکن تموت في أي وقت. يبقى الطبيعي و
المنطقي يعني مش لازم أقعد بقى اقولك خطبة
مبكية ونقعد نعط جنب بعض. حاجة منطقية
يا جماعة، إن أنت تستعد في أي وقت،
الموضوع بسيط أنت دفنة صاحبك أول
إمبارح، وأنت زعلانة دلوقتي ومن ساعتها
اتأثرت طب وبعدين؟؟

الحاجة الثانية اللي إحنا قلناها اللي هي بقى
توقع الندامات اللي هتحصل يوم القيامة لو إن
واحد لم يستدراك قبل الموت، مش هقولك بقى
ندمات الكافر دا دي بقى أسوء الندمات على

الاطلاق. ولا مجرد ندمات العاصي بل خد
الصدمة. قول الله تعالى (وأُنذِرهم يوم الحسرة
إذ قضي الأمر وهم في غفلة وهم لا يؤمنون)

قال السلف ما من أحد إلا يتحسر يوم القيامة
حتى وإن كان محسنًا

- إن كان محسنًا يتحسر إنه لم يزد عندما
يرى درجات الجنة توزع

يقول ياريتني صليت ركعتين كمان لليل
ياريتني كنت بصوم اثنين وخميس/النقاب/سنة
الضهر/ حفظت البقرة بس أنا شايف دلوقتي
الناس اللي معاه البقرة وآل عمران جاينين
البقرة وآل عمران كالطير تحاجان عن
صاحبهما طب أنا ليه محفظتش البقرة يعني و
يقعد بقى كده تخيلوا ده المحسن اللي هو داخل
الجنة أصلًا. ما بالك بقى بالمسيء هيعمل في

نفسه ايه؟ هتقولي ايه ده هو فيه حسرة في الجنة؟ لا ده الحسره دى في المشهد في يوم القيامة. لكن مجرد ما يخش أهل الجنة الجنة خلاص.

مش هيبقى في قلبهم لا حزن ولا حسرة ولا حاجة، ربنا هيراضي الجميع، ومحدث هيسلم ولا يتحسر. بس في الموقف. مال ك بقى باللي بيتحسر على إنه ضيع، اللي فرط، اللي عمل ذنوب كثير عمل معاصي كثير، وغلبت سيئاته حسناته بقى، وسواده بقي لو لم تنله مغفرة الله سبحانه وتعالى. توقع امتى بقى هيحصل فيه ايه المسكين دا؟ وكم ستكون حسرته؟ تخيل بقى الكافر بقى حسرته عاملة ازاي؟ وأنت بتسمعه هو نفسه بيقول يا حسرتاه، (يا حسرة على ما فرطت في جنب الله.. وان كنت لمن

الساخرين) وربنا بيقول (قد خسر الذين كذبوا بقاء الله). على الجانب الثاني بقى. شوف بقى كمية الحشرات اللي انت شايفها دي حشرات رهيبة جداً بل أنت لو تأملت في القرآن ستجد إن كل الحشرات تقريبا كانت على تضييع الاوقات وعلى التفريط في العمر. فتلاقي أهل النار بيقولوا (ربنا أخرجنا منها فإن عدنا فإنا ظالمون)(ربنا أخرجنا نعمل صالحا غير الذي كنا نعمل) وييكتوا على الوقت،(كم لبستم في الأرض عدد سنين قالوا لبسنا يوما أو بعض يوم. فأسأل العادين) فيسألهم (إن لبثتم إلا قليلا) (لو إنكم كنتم تعلمون فحسبتم إنما خلقناكم عبثا. وإنكم إلينا لا ترجعون) (إذ يقول أمثلهم طريقة إن لبثتم إلا يوما)(ويوم نحشرهم كأن لم يلبسوا إلا ساعة من النهار

يتعارفون بينهم قد خسر الذين كذبوا بقاء الله
وما كانوا مهتدين) وعلى ذلك بقى تجد
حسرات أهل النار فتجد ده يقول(يا ليتني
قدمت لحياتي) وعلى الجانب الثاني بتلاقي
اللي مقصرش بقى اللي فعلا استدرج قبل
الموت، وفاق قبل الموت والدنيا ظبطت معاه
والحمد لله. تلاقي صاحبنا ده بقى فرحان اوي
(هاؤم اقرأوا كتابي) يعني مش ندمان على
حاجة. (هاؤم اقرأوا كتابي إني ظننت أني
ملاقٍ حسابي. فهو في عيشة راضية في جنة
عالية) دا خلاص. ومثل ذلك اللي هو بقى
استدرك بس إيه طحن تعب اوي علشان يفوق
وعشان يستدرج. فأول ما يحط رجل في الجنة
يقول(الحمد لله الذي أذهب عنا الحزن إن ربنا
لغفور شكور، الذي أحلنا دار المقامة من

فضله لايمسنا فيها نصب ولا يمسنا فيها لغوب) النبي عليه الصلاة والسلام بيحكي عن صاحب الاستدراك دا اللي هو تعب أوي في الدنيا علشان يبقى حاجة فقال (يؤتى بأأس أهل الدنيا من أهل الجنة). يعني ده اطحن في الحياة. (فيغمس في الجنة غمسه واحدة) فيقال له هل رأيت بؤسًا قط؟ فيقول لا وعزتك مارأيت بؤسًا قط. اللي يشوف المشاهد دي لازم يكون في دافع. دافع زى إن أنت لا تعلم متى تموت؟ وامتى هتسلم ورققة الإجابة، وتخاف جداً من كم الندمات والحسرات التى تكون يوم القيامة وهو إننا نجد الشريعة تحت الناس على إدراك ما فات. يعني بتديك فرص تجد مثلاً حنة الإستدراك دي أو حنة إن أنت تعوض اللي فات الاجتهاد فيما هو آت زى ما

قلنا. هتجد إن الشرع فيه حاجات كتير أوي
شواهد بتشجعك على الموضوع دا يعني إيه
اشجعك على الموضوع دا؟ يعني بتقولك لو
حاجة فاتتك إرجع عادي. مثلاً في سورة
الفرقان قوله تعالى (تبارك الذي جعل في
السماء بروزا. وجعل فيها سراجا وقمرا
منيرا. وهو الذي جعل الليل والنهار خلفه لمن
أراد أن يتذكر أو أراد شكورا) يعني إيه جعل
الليل والنهار خلفه؟ يعني جعل في الليل
والنهار مستعجب يعني لو فاتتك حاجة في
الليل هاتها في النهار. فاتك حاجة في النهار
هاتها في الليل. وبنديك فرص كتير فاتك
وردك من قيام الليل ونمت عنه هاته في
النهار. النبي عليه الصلاة والسلام قال (من
فاته حزبه من الليل ففضاه ما بين الفجر

والظهر فكأنما صلاه من الليل). حاجة جميلة خالص وقال (من نام عن صلاة ناسيها. فهل يصليها إذا ذكرها لا كفارة لها إلا ذلك) لو فاتك أذكار الصباح بعد الفجر، قولها أي وقت. فاتك أذكار المساء قبل المغرب قولها أي وقت من الليل مش مشكلة، فاتك وردك اللي هو بعد الفجر هاتيه بعد الظهر. فاتني سنة الظهر القبالية. صليها بعد الظهر مش مشكلة. مصلتش سنة الفجر القبالية. صليها بعد الفجر او صليها بعد الشروق بتلت ساعة مش مشكلة هتجد إن الشريعة بتقولك عوض يا سيدي، هات في أي وقت إحنا نقبل منك بس عوض، حتى لو فاتك مفاتكش الخير، فتلاقي الشرع فيه حث دائم على الاستدراك، فتجد الله يقبل منك طالما أنت تحصل عبادة فاتك. فيقولك

أقضي مش مشكلة. (صلي قائما فإن لم تستطع فقاعدا، فإن لم تستطع فعلى جنب). فسبحان الله يعني طبعاً ده إستدراك العبادات غير كده بقى عموماً أحاديث التوبة وكل آيات التوبة كلها بتدل على تشوف الشريعة إنك أنت تستدرك ما فاتك. وإن أنت ترجع دائماً. فتجد مثلاً إحنا قلنا هو الذي جعل الليل والنهار خلفه. صح؟ لمن أراد أن يتذكر أو أراد شكوراً. تجد مثلاً قول النبي عليه الصلاة والسلام (إن الله يبسط يده بالليل ليتوب مسيء النهار. ويبسط يده بالنهار ليتوب مسيء الليل. حتى تطلع الشمس من مغربها) يبقى إذا أنا عملت ذنب بالليل توب في النهار، واحد تفرج على إباحية قبل ماينام، عمل عادة سيئة قبل ما ينام نامت ومصحيتش الفجر، متعمدة ونزلت عندك النهار مش

بتاعتك اصحى الصبح وتوب لله واغتسل
وصلي، وأكثر من النوافل ودد التوبة
ومتدش للشيطان حاجة هو مكانش يحلم بها،
متجش تقول أنا غلطت بالليل خلاص مفش
فايدة فيا و النهار متصليش، طب ليه؟ أنت بقى
تقولي أنا مفش فائدة فيا أنا اللي عملت بالليل
أنا رجعت كلمت الولد تاني، وبتكلم بالليل مع
ولاد. أنا اللي زي مينفesh تلبس خمار، أنا
اللي زي مينفesh تلبس نقاب، تروح أنت بقى
عاملة عواجب مع الشيطان وقالعة النقاب او
قالعة الخمار أنا بقى ألبس عادي لما ربنا
يهديني وأتوب عشان أبقى قدوة كويسة
ومينفesh ألبس النقاب وأنا مش قدوة والكلام
اللي الشيطان بيزينه ساعتها ده ويخليكي
توقعي الصلاة وتوقعي حجابك وتوقعي

اذكارك وتوقعي حلقة القرآن علشان كل اللي
حصل إنك بالليل كلمتي الولد أو اتفرجتي على
حاجة مش كويسة أو سمعتي أغاني

ف بدل ما تعملي استدراك وتوبة وعودة
عملتي اسوأ من السيئ اللي أنتِ عملتيه

عملتي للشيطان أحلى واجب وخليته يحبك
اوي ويقول أنا قاعد مع البنت ديه

ديه ممتازة كل ما أوقعها تقع أكثر وكل ما
أوقعها في ذنب خلتيه يعني يحبك قوي ويقول
انا قاعد مع البنت ديت دي ممتازة، كل ما
أوقعها بتقع أكثر وكل ما أوقعها في ذنب
بتديني لوحدها ثلاثة أربعة ذنوب لوحدها،
بالعكس إحنا عايزين استدراك زي استدراك
عمر كده، لما عمل غلطة يوم الحديبية قال
عملت لذلك أعمالا على طول ما زالت أتصدق

وأصوم وأعتق حتى ظننت أنه خير، عشان
كده الشيطان كان بيفر منه، يقول لك ايه لما
يلاقي الرجل ده يا جماعة ما ينفعش ما حدش
يوقعه غلط الرجل ده لما بيغلط بيرجع حته
راجعة. ده أنا بندم أن أنا وقعته في الغلط،
يبقى إذا الشريعة متشوفة إنك ترجع، وربنا
يقول إلا من تاب، سورة الفرقان برضو "إِلَّا
مَنْ تَابَ وَآمَنَ وَعَمِلَ عَمَلًا صَالِحًا فَأُولَئِكَ يُبَدِّلُ
اللَّهُ سَيِّئَاتِهِمْ حَسَنَاتٍ^{٢٦} وَكَانَ اللَّهُ غَفُورًا رَحِيمًا"
قُلْ يَا عِبَادِيَ الَّذِينَ أَسْرَفُوا عَلَى أَنْفُسِهِمْ لَا
تَقْنَطُوا مِنْ رَحْمَةِ اللَّهِ^{٢٧} إِنَّ اللَّهَ يَغْفِرُ الذُّنُوبَ
جَمِيعًا^{٢٨} إِنَّهُ هُوَ الْغَفُورُ الرَّحِيمُ" تمام؟ فنجد
تشوف الشريعة أن أنت أرجع دائما مهما
بعدت اسرفوا بقى على أنفسهم "قُلْ لِلَّذِينَ
كَفَرُوا إِنْ يَنْتَهُوا يُغْفَرْ لَهُمْ مَّا قَدْ سَلَفَ وَإِنْ

يَعُودُوا فَقَدْ مَضَتْ سُنَّتُ الْأَوَّلِينَ" ده حتى
الكفار لو رجعوا هنقبلهم، أنت ليه مستبعد أن
أنت ترجع؟ فسبحان الله يعني لذلك زي ما قلنا
إن أنت هتلاقي الشريعة كده ايه؟ بتقول لك
أرجع مهما حصل، حتى تلاقي مثلا مثلا في
الشرع تلاقي واحد قصر حياته في مثلا، فيأتي
يوم القيامة فيقال انزروا إلى صلاتي. فإذا
كانت تامة خلاص هيعدي. طب إذا كان فيها
نقص، يقول الله للملائكة يقول الله للملائكة
انظروا، هل لعبدي من تطوع؟ هل لعبدي من
تطوع؟ فتمنون به الفريضة؟ يعني عمل عمل
نوافل كده تجبر الفريضة والزكاة يجي في
الزكاة، لو قصر شوية في الزكاة ربنا يسأل
طب عنده صدقات دي تجبر دي، طب قصر
شوية في الصيام. طب عنده صيام نوافل دي

تجبر دي والأعمال على ذلك، فبالتالي هتجد
ان الشريعة ايه؟ دائما في حنة ايه في حنة أحنا
ولاد النهاردة في حنة ٦١ عمل كثير واللي فات
إن شاء الله ربنا هيجبرو وهكذا كل حاجة
بتقولك يلا الشريعة بتقولك يلا الوقت بيقولك
يلا العقل بيقولك يلا المنطق بيقولك يلا الموت
بيقولك يلا أنا مش هستناك حضرتك نعملك ايه
تاني؟ ربنا بيقول لك أنا أنا يعني أنا بحبك لما
ترجع. لله أفرح بتوبة عبدي إذا تاب إليه من
أحدكم كان في أرض فلاة ومعه ناقة عليها
طعام وشرابه، ففقدوها حتى أيقن الموت
فوجدوها على رأسه. فقال من شدة الفرح اللهم
أنت عبدي وأنا ربك من شدة الايه؟ الفرح.
ولما نشوف السلف عموما اه وهم كده ما فيش
حد فيهم كان بيبأس من نفسه، يعني كانت

موضوع أن هو يستدرك دي ثابتة عندهم أن هو مهما حصل يرجع. وطبعاً في في في واحدة مشهورة هنقولها بسرعة اللي هو استدراك الفضائل ابن عياط. فضائل ابن عياط رغم أنه كان قاطع طريق وكان بيحب بنت في الحرام، وكان يعني يعني صعب جداً وهو يقول في يوم سمعت قوله تعالى " أَلَمْ يَأْنِ لِلَّذِينَ آمَنُوا أَنْ تَخْشَعَ قُلُوبُهُمْ لِذِكْرِ اللَّهِ وَمَا نَزَلَ مِنَ الْحَقِّ وَلَا يَكُونُوا كَالَّذِينَ أُوتُوا الْكِتَابَ مِنْ قَبْلُ فَطَالَ عَلَيْهِمُ الْأَمَدُ فَقَسَتْ قُلُوبُهُمْ ۖ وَكَثِيرٌ مِّنْهُمْ فَاسِقُونَ " فقال لك بلى أنا يا رب، بلى أنا يا رب. نفس الفكرة بتاعة خالد وعمرو لما قال حتى متى؟ حتى متى؟ تمام؟ بلى أنا يا رب. خلاص دلوقتي عني بعد ما شاب وده كتاب يا عم أحنأ فيها، مش لسه في نفس بيتردد، مش

لسه في حياة فيا؟ بيقى أنا ممكن أرجع في أي وقت، ممكن أعوض في أي وقت وبعد كده بقى الفضائل ابن عياط قال إن من تمام توبتي أن أي من تمام توبتي ان لازم الحرم، فبعد كده بقى يلزم الحرم للعبادة حتى سمي عابد الحرمين، وبقى الفضائل اللي من عياض اللي يعني بيتقال عليه كلام كبير قوي، وسبحان الله يعني، بقى إمام وبقى قدوة لكل تائب ولكل عائد الى الله. خليني أقول لكم قصة أبو محجن، أبو محجن الثقفي. أبو محجن ده كان رجل غريب شوية كان مع سعد بن أبي وقاص، سعد بن أبي وقاص كان معه يعني كان معه في الجيش في جيش سعد بن أبي وقاص، فلأسف شرب الخمر، شرب الخمر، فعلم ابن أبي وقاص عشان مشغول بالغزوات وكده فحبسه لغاية ما

يرجع له. حبسه في بيته في بيته هو نفسه
وقيده بقيود قصة عجيبة وخلق الناس في البيت
قالهم الرجل ده محبوس في الأوضة دي لغاية
ما رجعله. المهم قامت معركة القادسية، كانت
معركة عنيفة جداً، وكانت أخبار المعركة
تصل إلى أبو محجن. وهو في الأسر مربوط
ومتكتف، فأخذ يتوسل إلى امرأة سعد بن أبي
وقاص إن تفك قيده قالها أبوس إيدك فكى قيدي
وأنا أوعدك أقسم بالله هروح المعركة أقاتل
وأعود إليك، إن أنا عشت سأعود إليك وإن أنا
مت فقد استراحتم مني، شوف الكلام ده شارب
خمر قال إن أنا مت استرحتم مني وإن أنا
عدت فسأعود إليك إن أنا حييت فسأعود إليك.
المهم إن هي صدقته. شافت عنده حماس
رهيب. فطبعاً فكت قيده. هو معهوش فرس،

قال لها أستأذنك أخذ فرس سعد بن أبي وقاص. وكان عنده فرس في البيت زيادة اسمها البلقاء، كان مسميها البلقاء ركب البلقاء وتلثم طبعاً عشان محدش يعرفه لأن معروف إن هو مفروض مش موجود، لبس لثام كده ودخل في معركة القادسية قالوا مالقي أحدا من الكفار إلا وعانده، يعني عمل معه الصح. وكان بيهد صفوف الكفار هد الوثنيين، اللي هم طبعاً القادسية المشهورة يعني. فما لقي أحداً من أعداء الله تعالى إلا وهده وهذا. حتى بدأ المسلمون ينظرون يقولون من هذا؟ وحتى صارت أشاعة في صفوف المؤمنين إن الله قد دعمهم بملك من عنده. تخيلوا كان بعضهم يقول هذا ملك من عند الله تعالى ما هو محدش عارفه. مين دا؟؟ ما هو كنا موجودين. مفيش

حد فينا متخلف. فبيقولوا مين دا؟ صارت
إشاعة إن الله أيدهم بملك من عنده. المهم
يقولوا لسعد بن ابن أبي وقاص ده ملك من
عند ربنا ولا ايه ده؟ ده داخل عمل شغل جامد
جداً. ايه الجمدان ده؟ سعد بقى بيتفرج
هيتجنن. اتجنن ليه بقى؟ ما هو سعد، قال والله
لولا إني تركت فرس البلقاء في بيتي لقلت هذه
فرس البلقاء. ولولا إني ربط أبو محجن بنفسي
في بيتي لقلت هذا أبو محجن الثقفي. والله فعلا
هيتجنن يقول ما دي فرسى أنا عارفها، بس أنا
سايبها في البيت. والضرب ده أنا عارفه ده
أبو محجن أنا عارفه بس أنا ربطه بنفسي في
البيت. وأنا مش مصدق وبعد كده خلصت
المعركة يدوروا بقى على الفارس ده محدش
لاقيه. فبين الفارس يا أخواننا؟ اختفى اختفى في

ثانية وخلصت المعركة ورجع سعد بن أبي وقاص إلى بيته دخل على أبو محجن أهم حاجة لقاه مربوط. هيتجنن. فسأل امرأته فحكته ما حصل، قالتله يا أبو محجن خذ البلقاء ودخل المعركة. فراح قالها يانهار أبيض! هو ده إحنا شفنا منه اللي مشفنا هوش من حد ده عمل وسوى هو رجع إزاي؟ قالت والله رجل وفي معي. رجع وربط نفسه بنفسه. وهو مستني إن أنت تعاقبه. يعني سبحانه الله عفا عنه سعد بن أبي وقاص فقال أبو محجن قال والله إن الله تعالى هو الذي أكرمني وأعطاني هذه المزية والفرصة أن أجاهد في سبيله. وأنه شكرا مني لله تعالى أشهدك يا سعد إنني تبت من شرب الخمر فوالله الذي لا إله إلا هو لا أشربها أبدا بعد اليوم، وفعلا ما شرب

أبو محجن الخمر بعد اليوم أبدا وصار من
أكابر فرسان المسلمين شوف الرجل شرب
خمرة يعني أنت مشربتش خمرة معملتش زي
أبو محجن وعملت عودة مش طبيعية إيه يا
عم! إيه الناس دي! فسبحان الله! يعني سبحان
رب العالمين يعني عندنا برودو مش بس
العصاة يعني يعني أنت حتى في السلف
ماكنش يعني يعني مستعظم إن هو كبير في
السن هو في ناس بيتفرجوا عليها دلوقتي كبار
في السن يقول لك أنت بتكلم الشباب يا عم
الشيخ إحنا كده كده القطر فاتنا والدنيا تعبانة
والركب خلاص إحنا خلاص ربنا يقوي
الشباب بقى وكان أنا بكلم الشباب معاك لا أنت
أولى الكبير في السن ده أولى بخطابي يعني
يعني خلاص ده أنت أنت فعلا زي ما بيقولوا

كده خلاص العظمة كبرت يعني يعني القبر
قرب يعني أنا آسف يعني بس بس عايز أديك
بقي مثال لمثال لناس جابوها، إيه؟

مهرروش عارفين كان في واحد من علماء
السلف كان يقول عن الإمام القفال. الإمام
القفال دوت كان إمام كبير في اللغة، كبير قوي
في اللغة ده مشهور يعني.

بس الإمام القفال ده المفاجأة إن هو بدأ طلب
العلم بعد سن الأربعين بدأ طلب العلم بعد سن
الأربعين، فمرة كده طلبت معه قال لها أروح
اطلب العلم واتعلم بقى، فهو رايح يطلب العلم
تردد قال يعني بعد ما شاب ودوه الكتاب! هو
انا يعني لسه هطلب العلم دلوقتي، فهمم
بالرجوع، وهو راجع شاف بقرة لا مؤاخزة
مربوطة بحبل في الساقية، الحبل ده كان

بيعدي على صخرة، وهو بيلف كده يروح إيه
في الصخرة كده بيعدي عليها، فبص للصخرة
لقى فيها علامات من أثر الحبل يعني اتبرت
منه.

فسبحان الله فاييه؟ فلما شاف المنظر ده قال إيه
يعني الحبل مع كثرة التكرار برى الصخرة!
طب يمكن أنا على بطئي وعلى حالتي
الصحية وعلى كبر سني واحدة واحدة وربنا
كريم وحوصل.

وفعلاً بدأ طلب العلم على سنه الكبير ده
وصار إمام في اللغة، رغم إنه بدأ طلب العلم
بعد سن الإيه بعد سن الأربعين وقال بيتين من
الشعر مشهورين أوي:

"اطلب ولا تضجر من مطلبي فإن آفة طالب العلم أن يضجرا" " ألم ترى أن الحبل بطول المدى على صليب الصخر قد أثرا "

يعني على الصخر الصلب ألم تر أن الحبل بطول المدى على صليب الصخر قد أثرا. سبحان الله يعني الإمام ابن الجوزي رحمة الله عليه، الإمام ابن الجوزي حاجة كبيرة قوي طبعاً بس العجيب إن الإمام الجوزي بعد سن الثمانين بص بقی الصدمة، بص ب الدمار ده، بعد سن الثمانين اكتشف اكتشاف مذهل إن هو عمل كل حاجة في حياته، ألف في كل العلوم، وكتب في كل العلوم، وخلص كل حاجة ما عدا حاجة واحدة بس انشغل عنها بسبب يعني أبواب العلم الثانية، والعمل الدعوي اللي هو كان مشغول به، اللي هو القراءات العشر.

اكتشف إن الحاجة الوحيدة اللي ما كملهاش
في حياته هي القراءات العشر، فقرر الإمام
ابن الجوزي أن يبدأ في القراءات العشر بعد
سن الثمانين، بعد سن الاليه؟

الثمانين وخلصها خلص القراءات العشر
يعني بدأ في قراءة العشر بعد سن الثمانين
وخلصها يعني دي يعني كونه بدأ تقول ممكن
بس مات في السكة، لا هو أنجز وخلص
والعجيب بقى أعجب من كل دوت وياريت
حد يجيب لي الأبيات دي من على النت اللي
هو بعد ما عمل كل ده قال أبيات من الشعر
بعد ما خلص القراءات العشر بيقول : "الله
اسأل أن يطول مدتي وأنال بالإنعام ما في
نيتي " لي همة في العلم ما من مثلها وهي

التي جنت النحول هي التي "كان رفيع شوية
" كم كان لي من مجلس لو شبهت* *حالاته
لتشبهت بالجنة

الله اكبر" الله اسأل ان يطول مدتي لسه عندي
حاجات عايز اعملها سبحان الله يعني ..

🔗 **الحاجة الثانية** الحاجة اللي بعد كده إن
أنا بديك أمل إن إن دايمما الشريعة بتقول لك
استدرك مهما كان حالك اللي هو ضربنا مثال
بأبو محجن الثقفي مهما كان سنك ضربنا مثال
بالإمام القفال والإمام الجوزي رحمة الله على
الجميع تمام فاضل لي بقى الثالثة بقى يعني
دلوقتي قلت لك او تخلينا نقول رابعة..

🔗 **الشريعة بتقولك استدرك**

🔗 **أحوال السلف بتقول لك مهما كان حالك.**

☞ ثلاثة مهما كان سنك.

☞ اربعة ممكن في مدة قصيرة تدرك ما يحتاج إلى أعمار طويلة وبالهمة ممكن تعمل أي حاجة الهمة العالية ممكن تعمل أي حاجة.

هضرب لكم بقى دلوقتي أمثلة حاجة غريبة جدا ناس عملوا إنجازات ضخمة يعني أنا بقول لك أنت دلوقتي بتستدرج طيب خرينا من ابن الجوزي ابن الجوزي يخلص القراءات العشرة في مدة قصيرة جدا بس خليه هو يعتبر مثال برضو ينفع بس هنعديه هقول لك ناس انجزوا في حياتهم جامد جدا سنوات معدودة عمل إنجازات مذهلة في عمر ايه في عمر قصير أنتم عارفين أشهر مثال سعد بن معاذ سعد بن معاذ عاش في الإسلام كله ست سنوات سعد ابن معاذ

اسلامه كله ست سنوات تمام بتكلم في واحد
كل اسلامه ست سنوات بس سعد ابن معاذ
اللي هو قلب الدنيا في غزوة بدر وفي بني
قريظة واللي بسببه أسلم أهل المدينة ولما مات
اهتز لموته عرش الرحمن فرحًا بمقدم روح
سعد بن معاذ ست سنين صار من كافر ويصد
عن سبيل الله وكان هيضرب مصعب ابن
عمير وكان يشتم المؤمنين في المدينة إلى
واحد اهتز لموته عرش الرحمن فرحًا بمقدم
روح سعد بن معاذ الجميلة دي كل ده في دي
ست سنين ست سنوات دلوقتي انت يعني إن
شاء الله ربنا يديك الصحة ست سنين تعمل
حاجات كتير قوي تمام يعني معلىش في ناس
ملتزمة منكم بقى لها ست سنين بقى لها عشر
سنين بقى لهم عشرين سنة خلاص كمان يبقوا

حاجة تانية بقى غير همة عالية ننشف شوية
تمام معاذ بن جبل اللي هو احنا عارفينه أعلم
الأمة بالحلال والحرام معاذ ابن جبل مدة
حياته مع النبي عليه الصلاة والسلام عشر
سنين صار أعلم الأمة والنبي عليه الصلاة
والسلام بيقول معاذ بن جبل أمام العلماء بربرة
يوم القيامة يعني برمية حجر يعني معدي
الناس كلها كل ده وكل حياته عشر سنين في
الإسلام إزاي وصل لأنه مات عنده ثمانية
وعشرين سنة متخيلين مات في طاعون
عمواس الطاعون اللي أصاب الشام في زمن
سيدنا عمر بن الخطاب رضي الله عنه هو
مات فيه مات عنده ثمانية وعشرين سنة يا
جماعة معاذ .. أصل أنت دايمًا عندك صورة
ذهنية ان معاذ ابن جبل دا رجل كبير شيخ بقى

لحيته بيضاء وبتاع يا جماعة معاذ ابن جبل
أسلم عنده تمتعشر سنة ومات عنده ثمانية
وعشرين سنة أنا عندي أربعين سنة دلوقتي
وما عملتش أي حاجة في حياتي بالنسبة يعني
إزاي إزاي أنا أمثلا أنا واحد يعني أنا عايز
اموت نفسي أنا عايز يعني اعمل في نفسي ايه
أنا بقى لي عشرين سنة اللهم بارك يعني في
الطريق الى الله ما عملتش حاجة بالنسبة معاذ
أنا ما عملتش حاجة صفر ده في عشر سنين
بقى أعلم من الأمة بالحلال والحرام واحد في
ست سنين اهتز لموته عرش الرحمن طب أنا
بعمل ايه أنا الايه الدلع اللي احنا فيه ده طب
ما تنجز شوية فيه وقت خدوا دي كمان أنتم
عارفين سيبويه اللي هو أعلم يكاد يكون من
أعلم الناس باللغة في سيبويه ده أصلا راجل

مش عربي وطلب في علم اللغة متأخر وصار
من أعلم الأمة باللغة ومات عنده اثنين وتلاتين
سنة صباح الخير مات عنده اثنين وتلاتين سنة

سببويه طيب الإمام النووي رحمة الله عليه
أنتم عارفين الإمام النووي ده يكاد يكون
مؤلفاته تملئ مكاتب يعني ممكن مكتبات تملئ
بمؤلفات الإمام النووي سواء المجموع سواء
الشرح رياض الصالحين سواء صحيح مسلم
سواء يعني كتب ما لهاش نهاية للإمام النووي
الإمام النووي كل مؤلفاته ألفها في عشرين
سنة من سن خمسة وعشرين هو مات عنده
خمسة وأربعين سنة خلي بالك من النووي
مات عنده خمسة وأربعين سنة يعني كان أكبر
مني خمس سنين لما مات الإمام النووي كان
أكبر مني بخمس سنين لو أنا أصلا مش لاقى

وقت اقرأ اللي ألفه الإمام النووي مش لاقى
وقت اقراه هو مات عنده خمسة واربعين سنة
يعني يمكن، نجتهد، نحاول يا جماعة، ابن القيم
-رحمة الله عليه- عاش مع ابن تيمية ستاشر
سنة بس، قعد يطلب العلم عند ابن تيمية -
رحمة الله على الجميع- ستاشر سنة فبقى
الإمام ابن القيم -رحمة الله عليه- اللي عايز
أقوله يعني ما تيأسش، وهديك كم رسالة
إيجابية الرسالة الأولانية الشريعة بتقول لك
ارجع، بعيد عن ربنا ارجع، مقصر في عبادة
ارجع، فرطت في طلب العلم كل حاجة ممكنة
كل حاجة بتقول لك ارجع، نمرة اتنين مهما
كان غلطك ارجع، أنت مش اسوأ من أبو
محجن الثقفي ولا اسوأ من فضيل ابن عياط،
نمرة ثلاثة مهما كان سنك ارجع وشفنا الإمام

القفال والإمام الجوزي، والرابعة بتقول لك
حتى لو فاضلك مدة قصيرة ممكن الرسالة
الرابعة بتقول لك ممكن، رغم ضيق الوقت
رغم إن العمر قصير رغم ما فاضلك كثير
ممكن تعمل إنجاز ما زال هناك فرصة
للإنجاز في حياتك للإنجاز في حياتك تمام،
طيب خرينا نقول كلمتين برضو لازم تراعي
كذا حاجة لما تيجي تقول أنا عايز أنجز في
حالي، احنا كده كده هنرجع تمام، طيب خرينا
نقول الأول إن رجوعي دوت لازم يبقى فيه
توازن، لازم يبقى فيه توازن يعني أنا عايز
أرجع أرجع أعمل ايه؟ الأول هنتكلم عن
التوازن بعد كده هنتكلم عن تخصص كل
واحدة هحاول تاخد مني عشر دقائق بالكثير،
هنقول حاجتين نختم بيهم، لما ترجع او لما

تيجي عايز تبدأ تبقى بني آدم -أسف يعني-
عايز ابقى بني آدم عايز أبقى حاجة كويسة في
الحياة ديت عايز أبقى شخص سوي، يرضي
ربنا -سبحانه وتعالى- لازم لما ترجع تراعي
ست محاور وتحاسب نفسك عليهم، عشان احنا
مش عايزين واحد يرجع أعرج، يعني يرجع
أعرج فاحنا قاعدة بتفكر أنا عايزة أرجع لطلب
العلم، ونكتشف إن هي في الآخر مقصورة في
بر الوالدين، ما أنت رجعت بس عرجاء، واحد
دلوقتي في باله عايز أرجع مثلاً أصالح مراتي
فيرجع تمام بعد اللايف دة هيرجع، بس هو
لسه تارك صلاة الفجر، فمش عايز كل واحد
قدامي دلوقتي لما يجي يحط في ذهنه دلوقتي
تصور الرجوع، أو تصور الإستدراك يبقى
تصور قاصر، تصور ايه قاصر اللي هو

دلوقتي أنت كل واحد فيكم بيفكر في فكرة واحدة بس، ده غلط ده اللي أنا جاي دلوقتي أقومك فيه، إن رجوعك لازم يبقى فيه توازن، لازم تفكر في ست كلمات هقولها دلوقتي، ست كلمات أكتبوها ودي اللي دلوقتي لما تيجي تفكر في رجوعك أو في إكمال شخصيتك أو إنك أنت فعلاً تبقى النموذج المثالي اللي احنا عايزينه، يبقى لازم ايه يبقى لازم نرجع صح مش عايزك ترجع تصلي الفجر بس، ولا عايزك ترجع تطلب علم بس، أنا عايز التوازن عايز شخصية متكاملة، إكتب معي ست كلمات، واحد محور إيماني أو ممكن نسماه تعبدية، إيماني أو تعبدية، نمرة اثنين محور أخلاقي تربوي، نمرة ثلاثة محور علمي، نمرة أربعة المحور الدعوي، نمرة

خمسة المحاور الإجتماعي، نمرة ستة المحاور الشخصية، ست محاور علشان أكون شخصية سوية وأنا رجعت الرجوع كامل مش رجعت أعرج، واحد كان مثلاً مشلول رجع بس بيعرج ليه؟ طب ما نرجع نمشي عادي ليه برضه الدنيا مش مضبوطة معاك؟ وهفضل تعرج لغاية ما تقع تاني، ماهو اللي بيعرج بيقع في الآخر مش هتعرف تعرج للأبد، فهترجع وتتوهم إن أنت رجعت بس هترجع أعرج فهتقع بردو، لازم ترجع سوي فا ست محاور إكتبوها، المحاور الإيماني التعبدية اللي هو الأولاني، المحاور التربوي الأخلاقي، نمرة ثلاثة المحاور العلمي، أربعة المحاور الدعوي، نمرة خمسة المحاور الإجتماعي، نمرة ستة المحاور الشخصي، طيب تعالوا نفصل بسرعة

في كل محور شأن أفهمك يعني ايه رجوع
متوازن، المحور الإيمانى يشمل عندي يشمل
عندي العبادات، الصيام، القيام، قراءة القرآن،
الصدقة، الزكاة، الحج، العمرة، النوافل،
العقيدة، تصحيح أعمال القلوب، المحور
التعبدي التعبدي اللي بينك وبين الله -تعالى- ده
محور لازم وأنا برجع أتأكد إن ده اتضبط، ولو
التعبد ما بيني وبين الله -تعالى- وقوة إيماني
التي بيني وبين الله -تعالى- يشمل ذلك الصلاة
والصيام الزكاة فضائل الأعمال النوافل ترك
المكروهات كل ما هو عبادة لله -سبحانه
وتعالى- بيتدي أحاسب نفسي على المحور
دوت، وطبعًا في أي محور نبدأ بالواجبات ثم
المستحبات أنا دلوقتي لسه برجع فمش هرجع
للمستحب وأنا سايب الواجب فدايمًا في أي

محور من المحاور اللي بتكلم فيها بتقسمها ايه
قسمين الواجبات والمستحبات، وبعد كده بتبدأ
ايه بتبدأ عملية الإستدراك، إن أنت تبتدي تقول
ابدأ بدي ثم دي أو ابدأ بكله لو عندي صحة
أعمل كله، لكن لو تعارضت الأمور يبقى
الواجبات الأول حلو الكلام، طيب حتى
الواجبات ديت ممكن نقسمها إلى واجب فوري
أو واجب يفوت، لازم يتعمل فوراً وواجب
على التراخي، ممكن أعمله بس بعدين واجب
فوري زي ايه زي إن أنا أصلي دلوقتي مثلاً
فايتني صلاة صليها دلوقتي أو إن أنا أصحى
الفجر، ده لازم دلوقتي لازم أعمل خطة
النهاردة إزاي هصحى الفجر اللي جاي لكن
مثلاً لو أنا علي صيام مثلاً، من رمضان
ممكن أصومه النهاردة أصومه بكرة ممكن

دوت أستدركه على مهلي، تاني إحنا قلنا بنقسم كل محور عيني على الواجبات يتعملوا الأول، وبعد كده إذا كان هناك تعارض يبقى أعمل المستحبات، طيب الواجبات هنقسمها نوعين واجب يفوت وواجب لا يفوت الواجب اللي يفوت اللي هو لازم أعمله دلوقتي، حاجة دلوقتي لازم تتعمل زي الصلاة زي إن أنا أصلي الفجر زي إنك تاخدي قرار في حجابك، حاجات دلوقتي هنزل دلوقتي لازم آخذ قرار دلوقتي أنا هخرج دلوقتي، وفي واجب لا يفوت يعني أو ممكن يمكن تأخير، زي الحج مثلاً واحد مقصر فرط في الحج فترة في حياته عايز يحج، ممكن السنة دي ممكن السنة الجاية فدي نتفاهم فيها يبقى دائماً المهم في كل محور قسمها كده واجب مستحب

والواجب نفسه واجب يفوت وواجب على التراخي، فالأول هبدأ بالواجب الذي يفوت ثم الواجب اللي على التراخي ثم المستحبات، أو أعمل كله لو عندي صحة أعمل الجميع، طيب المحور الثاني محور الأخلاقي التربوي، دة يشمل ايه؟ يشمل الأخلاق بقى والأمور التربوية زي إن أنا بحاسب نفسي على الأخلاق، الصدق أنا بكذب ولا ما بكذبش، الغيبة بغياب ولا ما بغيبةش، الأمانة عندي أمانة في شغلي، في مواعيد شغلي في أمانة في أدائي لشغلي في أمانة؟ في أمانة في تعاملاتي المالية؟ في علاقاتي بالآخرين، أحاسب نفسي عالعفة في غض البصر، بحاسب نفسي على العفة في الكلام مع النساء والمعاملة مع النساء، ومعاملة النساء مع

الرجال، أراجع نفسي، أخلاقي بالضوابط اللي أنا ملتزم بيها؟ هل الضوابط دي خفت ولا مخفتش؟ أرجعها؟ لازم ترجع ازاي؟ هل أنا عندي علاقة غلط محرمة في باب العفة؟ لازم تقطعها وتتقطع فوراً، مفيش على التراخي في دي وهكذا، أبتدي أحاسب نفسي على ما يتعلق بالأخلاق والتربويات، الآداب، الأخلاق، المعاملات، الأخلاق ما يتعلق بالعفة، بالصدق، بالأمانة، بالوفاء، كل ما هو داخل في باب الأخلاق كما ضربت لكم أمثلة، فالجانب التربوي الأخلاقي برضو بحطله أمثله وأبتدي أتابع نفسي فيه ونفس الفكرة الواجب ثم المستحب والواجب الذي يفوت والذي لا يفوت، نمرة ثلاثة المحور العلمي، المحور العلمي بحاسب نفسي على العلم، طلب العلم،

ونفس الكلام بحاسب نفسي على العلم الواجب
الأول، تعلم العقيدة كده كده عايز أروح
القاهرة، هيحصل إيه؟ العربية هتقف مني في
نص السكة مش هتوصل، فديت الدابة العربية
اللي أنت راكبها، فأنا لازم _أنا آسف_ أدلع
العربية؛ مش أدلعها إن أنا دلع يعني اللي هو
بمفهومكم أهتم بها يعني، أهتم بصحتي كويس،
أهتم بنومي كويس، أهتم بإن أنا ألعب رياضة
ولو رياضة في البيت ولو حاجات كده مجرد
بس إيه الحاجات البسيطة اللي بتتعمل في
البيت أحافظ على صحتي، أحافظ على وزني؛
وزني ما يزدش قوي علشان ده هيقفني، أنتِ
ولا عارفة تطلعي سلم وبتفكري إزاي هروح
أعمل عمرة بالوزن ده؟ هعمل حج إزاي
بالوزن ده؟ لازم الوزن يبقى كويس، ده مش

رفاهية ده مش دلع اللي بتخسس دي مش بتدلح
لو نيتهها كده فعلا، الشاب اللي بيحافظ على
صحته لله فعلا ده اهتمام كويس، ما نأكلش
أكل بايظ، ما تكلوش الأكل يا جماعة بتاع
الشوارع ما تاكلوش الحلويات الكثير، ما
تشربوش حاجة ساقعة لا مقاطعة ولا غير
مقاطعة الحاجة الساقعة كلها مرفوضة، دي
الجنة دي هي دي اللي مكلمة معايا أو هتنهار
في خلال ١٠ سنين لو أنا كملت على كده،
فاهتمامي بالصحة، الطعام، الرياضة اهتمام
بشيء من الترفيه يعني شيء من الترفيه
بخرج مرة في الأسبوع بروح مرة لعب كرة
مع زمائلي بتاع، شيء من الترفيه بيجدد
نشاطي وبيجدد همتي تاني، واهتمامي ببعض
ممکن عندي شوية هوايات مفيش مانع إن أنا

عندي هواية معينة بحب مثلا البرمجة، بحب
صيانة الموبايلات، بس تكون يعني هواية
نافعة متكونش هواية محرمة أو تفسد القلب،
هواية حلال مفيهاش حاجة بتحبيها تحبي
تخطي حاجات جميلة أنا بحبها هي دي اللي
بتبسطني فلما بتبسط بنشط تاني في العبادة
وفي طلب العلم والحاجات دي، حلو، ما
عنديش مانع طالما واخدة حجمها الطبيعي،
شفتوا الست محاور دولة دول اسمهم محاور
العودة، كل المحاور دي لما تيجي تعملي عودة
تفكري في ٦ محاور دول ونظبط كل حاجة
في المحاور ديت.

آخر حاجة هقولها النهاردة وهي مجال
التخصص؛ لا شك إن كل حد فينا بعد كل ده
بيقول طيب ده ده العودة العامة إن أنا هرجع

اظبط كل ده عشان التوازن؛ فنفرض بقى أنا
عايزة اتميز في باب معين عايز أشد أنا
رجعت خلاص أنا رجعت ظبطت الدنيا، عايز
أتميز بأسباب معين اتميز في إيه؟ إيه رأيك في
طلب العلم؟ طب إيه رأيك في العبادة؟ طب إيه
رأيك اتميز في بر الوالدين؟ إيه رأيك يكون
تميزي في تربية ولادي؟ إيه رأيك يكون
تميزي في السعي على الأرامل والمساكين
والأيتام؟ كل ده متاح على فكرة، إيه رأيك
تميزي يكون في تعليم العلم؟ في حفظ القرآن،
في تحفيظ القرآن

وأنا أعمل إيه ولا إيه صح؟ ده كل ده! طب
أنا اتشتت دلوقتي، خلاص أحنا عدينا التوازن
ها إنسى التوازن هنتكلم في التخصص التميز،
دلوقتي كل واحد أو واحدة فينا سامعاني

دلوقتي ده دايمًا فكرته طب أنا عايز بقى اخدم الدين في حته كده، في حاجات كتير قوي في حفظ القرآن، في تحفيظ القرآن، في دعوة الأجانب في الدعوة في أفريقيا، في الدعوة خارج مصر، في الدعوة داخل مصر، في دعوة الشباب، في الطلائع، في الأشبال، في الأطفال، في التميز في طلب العلم نفسه، في التميز في العبادة، أكون عابدة، صلاة وصيام وقرآن والدعوة، يعني في توازن طبعًا كده كده في التوازن بس التميز أنا لما أقول تميز مش معنى كده لغيت الباقيين عشان ما تفهمنيش غلط ما تبوظليش تاني اللي أنا قلته؛ التميز يعني أنت كده كده محافظ على معدل معتدل من كل اللي أنا قلته اللي فات، التميز يعني دي زيادة، عايزة تميز في العبادة هشد حيلي في

القيام، في الصيام، أنا هكون العابدة، أنا عايزة
أكون العابدة زي نساء السلف منهم العابدات،

أنهي بقى؟ هو ده بقى السؤال المتعب اللي هو
دائما اختيار مجال التميز، طيب اختيار مجال
التميز ده سهل، مسألة الإجابة الأولانية إن لا
يوجد مجال محدد للنصيحة يعني مفيش حاجة
أقولك أعلمي كذا، مفيش الكلام دوت لأن كل
واحد له ظروف هتؤثر على اختياره عشان
تختار اختيار صحيح لازم الأول أقسم ؛
حاجات؛ اكتبوا الأربع حاجات دي يا جماعة،
نحاول ننجزها عشان ما نطولش عليكم، أربع
حاجات لازم تقيميهم قبل ما تقولي إيه المجال
اللي أقدر أتميز فيه :

1 . نقط القوة اللي عندك أو اللي عندك

2. نقط الضعف اللي عندك

3. الفرص المتاحة

4. التهديدات المؤثرة

أربع حاجات هنبص عليهم ساعتها هتعرفي بالظبط أنت عايزة إيه، بعد ما تبص للأربعة دول هتعرفي أنت عايزة إيه بالظبط، لأن أحياناً الاختيار بيبقى بالهوى، بس هو بيبقى اختيار مش مناسب ليكي أو مش هينفع يتعمل فده كلام ملوش لازمة، فالأول نقيم الحاجات دي ساعتها نعرف ننفع في إيه؛

نقاط القوة: أنت إيه؟ والله أنا تعليمي كويس دي نقطة قوة، أنا غني نقطة قوة، أنا أهلي موافقين على إلزامي دي نقطة قوة، أنا مش متجوز فأحنا مش عارفين دي نقطة إيه بس

قصدي عنده وقت فراغ شوية فدي نقطة قوة،
طيب من الحاجات نقطة قوة عندي إن أنا
بحب القراءة، حلو طب تعالى لي بقى الثاني
نقطة ضعف: مثلا أنا انطوائي مش بعرف
اتكلم يعني بتكلم بس مش اللي هو المتكلم يعني
انطوائي شوية، نقطة ضعفي ما بعرفش أحفظ
كثير، حفظي ضعيف قوي، من نقط ضعفي إن
أنا مثلا عصبي شوية، يعني مثلا نبتدي نقولوا
نقط معينة: من نقط ضعفي مثلا إن أنا بسافر
كثير عمري ما أعرف أعمل لنفسى نظام أو
جدول، أو شغلي دائماً ملوش مواعيد ثابتة
فدي نقطة ضعف عندي، أنا باديكم أمثلة،
طيب تعالى نقولوا الفرص المتاحة: أنا الناس
كلها بتحبني أي حد بيسمع كلامي، الفرص
المتاحة فيه مسجد تحت البيت عندي وواحد

راحتي فيه ومحدث بيكلمني مش ممنوعين من
أي حاجة، الفرص المتاحة فيه دار قريبة مني
وممكن اشتغل فيها عمل دعوي، الفرص
المتاحة: أنا متاح لي أسافر لأفريقيا عادي جدا
ومش هيعطاني ولا يآثر على شغلي ولا حياني
أنا كده كده فاضي أروح أفريقيا أدعوا إلى الله
هناك، الفرص المتاحة: أنا في حواليا شيوخ
كثير طلب العلم سهل جدا عندنا في القرية،
ممكن أطلب علم مع أي حد والدنيا معايا سالكة
جدا وسهلة، تعالوا نحط التهديدات المؤثرة:

1 . أنا أمني عيانة ولازم أقعد جنبها، مع إن
أنا قلنا أنا عندي نقطة قوة إن أنا بروح
وباجي وأعرف أتصرف وبتاع بس في تهديد
مؤثر عليا، مش تهديد حاجة وحشة على فكرة
يعني حاجة بتعوقني بس هتكون مانع، أنا والله

أمي مريضة ولازم أكون جنبها مينفعش
أسببها ومينفعش خالص لأن هي معتمدة عليا
٢٤ ساعة، ده أنا احطه في التهديدات فدي
يعني حاجة وحشة على فكرة يعني هي عائق
معين، أنا شايل شغل أبويا في الأرض وأنا
اللي شايل الدنيا وكل اللي الدنيا معايا وأبويا
ميقدرش يستغنى عني رغم إن هو مش عيان
بس كل حاجة معايا أنا مينفعش أسافر مينفعش
أسببه وهكذا، أنا عندي ولاد كتير ماشاء الله
مخلفة خمسة فمسألة إن أنا أخرج برا البيت
أروح دروس أنزل دار ده صعب جدا لأن
دائما في ظروف مبعرفش أتحرك من البيت
بسهولة، عارفة لما تقيمي بقى الأربع حاجات
دول هتعرفي أنت تتفعي في إيه، لأن دائما
دائما في حاجة ممكنة، يعني مثلا تعالى نتخيل

واحد عنده نقط قوة مثلاً واحدة مثلاً عندها
نقطة قوة بتحفظ كويس جداً حفظها كويس
جداً، ذكية

مثلاً حلوا؟ من نقط ضعفها مثلاً : ضعيفة بدنياً
دي نقطة ضعف عندها مثلاً، خجولة مش
بتعرف تتكلم أوي

2. مثلاً الفرص المتاحة إن هي عندها
كمبيوتر كويس، لاب كويس، موبايل متقدم،
عندها نت سريع، عندها يعني تعرف يبقى
عندها وقت في بيتها جوا البيت تعرف تظبط
وقت كويس، مثلاً معندهاش بره البيت حاجة
بتشغلها هي في بيتها ومعها وقتها فدي إيه
دي فرص كويسة،

في تهديدات إن هي مثلاً متعرفش تسيب
البيت عشان عندها ابن صغير ودايمًا الابن
الصغير دوت محتاجها ٢٤ ساعة فهي
متعرفش تسيب البيت، ممكن هي بقى بالشكل
ده تعرف هي تنفع في إيه، فتيجي مثلاً نقولها
هل دي تنفع يبقى حلم حياتها تدعو إلى الله في
أفريقيا؟ ملوش لازمة يعني ملوش لازمة تحط
حلم زي ده، مش مناسب ليكي، هل ممكن
واحدة زي دي تحط حلم حياتها إن هي تبقى
مثلاً يعني من العلماء الربانيين ممكن متبقاش
كده مش مفيش المساحة لكده، بس والله لا أنا
ممكن ظروف في تسمح بإيه؟ طب أنا ممكن
أحفظ قرآن واجتهد في القراءات ما أنا بحفظ
كويس وعندي وقت، وممكن إيه كمان؟ ممكن
أحفظ أونلاين أو أشتغل دعوة أونلاين إن أنا

عندي كل حاجة متاحة، كده كده البيبي جنبي
مش معطلني أنا المهم أقعد جنبه، بس أنا في
البيت فيه وقت ممكن أتميز في التحفيظ
أونلاين، ممكن أتميز في التعليم أونلاين،
ممكن أتعلم اللغة العربية وأتعلم إنجليزي أنا
ذكية برضو وأدعو الأجانب أونلاين، كده
جبتلك شفت رغم إن أنا لقيتلك في نقط ضعف
عندك وفي تهديدات بس قدرت أحول
المنظومة دي لنتيجة في الآخر أنفع أتميز في
بيت، ممكن أجيبلك واحدة تانية خالص أو حد
تاني خاينا نقول راجل مثلاً: لا هو عنده ما
شاء الله قوة ذكاء وحفظ وبتاع بس عنده نقط
ضعف مثلاً إن هو فقير معهوش فلوس فقير
جداً، إنه هو مثلاً الفقر مثلاً عنده فرص
متاحة: متاح ليه إن هو يتكلم على النت، متاح

ليه مساجد، متاح ليه دور قرآن، متاح ليه كذا حاجة، وفي نفس الوقت معندوش تهديدات فده ممكن يعني يشتغل دعوة، مش متجوز، مخلص كليته، فاضي، أهله بيصرفوا عليه دي نقطة قوة فده ممكن يروح يدعو إلى الله في أفريقيا، ممكن يتفرغ لطلب العلم، ممكن يتفرغ للدعوة إلى الله، عنده حاجات كتير، فبس اللي عايز أوصله من خلال الفكرة دي إن أنت لما تيجي تحطي الأربع معاير دول لوحدهك هتقدري تقولي أنا إيه المجال اللي يناسبني أتميز فيه ومبيقاش مجرد حلم كده غير قابل للتطبيق لا هيبقى حلم قابل للتطبيق عادي جدًا، مع مراعاة اكتبوا برضو اكتبولي أربع حاجات أربع كلمات اكتبوها جنب الكلمات اللي قولناها اكتبوها دلوقتي لازم برغم إن أنا عملت كذا

في أربع حاجات لازم أحاول أعملهم دايماً وأنا خلاص اخترت مجال تخصصي بس في حاجة بعملها دائماً اكتبوا أربع حاجات جنب الأربع كلمات:

1 . نقط القوة اكتبوا جنبها أقوىها.

2 . نقط الضعف أحاول إزالتها.

3 . الفرص أحاول إكثارها

4 . التهديدات أحاول إزالتها

أحاول، بحيث إن أنا مع الوقت لو قدرت أقوى
نقط قوتي أكيد أحسن، قدرت أشيل نقط من
ضعفي: أنا مكنتش بعرف أتكلم روححت
اتعلمت إزاي أتكلم، روححت اتعلمت دورات
عشان أعرف أعمل مخاطبة ومحادثة والكلام
ده، كنت انطوائي حاولت أبقي اجتماعي، ببقى
أنا نقط قوتي بقويها، نقط ضعفي بحاول أقللها،

الفرص بحاول أكثرها على قد ما أقدر،
التهديدات إذا كان في إمكاني بحاول برضو
أزيلها أو أقللها، بحيث إن أنا مع الوقت يتوفر
لي مساحات أخرى مع الوقت يتوفر لي
مساحات أخرى للتميز والتخصص، فهتموا
الفكرة؟ مش أنا مش بستسلم للواقع بتاعي،
مش هقول هي دي نقطة ضعفي وخلاص، في
تهديدات وخلاص، لا ما أنا نقط ضعفي دي
أحاول أزيلها إذا استطعت، في حاجات غصب
عني، في حاجات أقدر في أيدي، التهديدات في
حاجات غصب عني أمي التعبانة دي هعملها
إيه مثلاً لكن في حاجة كان ممكن أنا أتعامل
معاها، يبقى دائماً نقط قوتي أقوىها، نقط
ضعفي أزيلها، الفرص المتاحة أحاول أزودها،
تهديدات أحاول أزيلها برضو وأزيحها بحيث

إن مع الوقت مع تقدم العمر ألقى فرص ثانية
بالنسبة لي في مجالات أخرى للتخصص أقدر
أبقى أحسن فيها.

يبقى إحنا كده النهاردة خلاص اتكلمنا في كل
المحاور؛ محور التحفيز اللي اتكلمنا فيه
الأول، اتكلمنا عن عناية الشريعة بالاستدراك،
ممکن الاستدراك في أي وقت، ممکن
الاستدراك في أي سن، ممکن الاستدراك مهما
بعدت ممکن في وقت قصير تنجز قوي، ممکن
ممکن ممکن اتكلمنا على المجالات الستة
للاستدراك، إزاي إن أنا أعمل توازن؟ واتكلمنا
على التخصص وإزاي تحدده وإزاي تختار
مجال التخصص، كده خلص الدرس وتقريبًا
ده هيبقى آخر درس في سلسلة الناجون من
عصر التفاهة، فاكربين سلسلة الناجون من

عصر التفاهة اللايف اللي فات واللايف ده
هينضافوا إلى سلسلة الناجون من عصر
التفاهة، وتقريبًا كده أنا قولتلكم يعني ما يناسب
السلسلة ديت واللي فاتة حاجة من السلسلة دي
يبحث عن سلسلة "الناجون من عصر التفاهة"
هيسـتفيد أوي أوي أوي منها، بقوا ست دروس
الحمد لله، بقوا ست حلقات دلوقتي ربنا ينفعنا
بما قلنا وسمعنا، جزاكم الله خيرًا.

سبحانك اللهم ربنا وبحمدك أشهد أن لا إله إلا
أنت أستغفرك وأتوب إليك، السلام عليكم
ورحمة الله.

ربنا يبارك فيكم ويعلمكم، يا رب تكونوا
استفدتم من درس النهاردة ونكون اتعلمنا
كويس خطة العودة، عرفتوا خطة العودة
أخيرًا الحمد لله؟ عودوا بقي، عودوا بقي

زهقتونا كفاية كده بقى، كفاية دلع، عودوا،
اتكلمنا في عصر التفاهة، لا أبرح حتى أبلغ،
"وما الهم الذي تحمله؟"، "وما زال هناك وقت
للعودة"، و"خطة العودة" عودوا بقى مش كده
تعبتوني، مش كده أنا زهقت عودوا بقى الله
يكرمكم عشان أنا تعبت معاكم، ست دروس
عشان عودوا دي، ست دروس عشان أقنعكم
بطلوا التفاهات وعودوا بقى، يلا بقى عودوا
بقى.

ربنا يبارك فيكم يا رب ويرضى عنكم يا رب
ويرزقنا وإياكم القبول والرضا والثبات اللهم
آمين.

**جزاكم الله كل خير، انشروا بقى الدنيا دي
سبحانك اللهم ربنا وبحمدك، أشهد أن لا إله**

إلا أنت، أستغفرك وأتوب إليك السلام عليكم.

▪